



Iacobus à teneris annis operam literis dedit, & primis fundamentis perceptis ordinem Dominicanorum ingressus, sese hinc inde ad uarias Academias contulit, atq; in primis Hebraicæ linguæ & Theologiæ operam dedit. In ijs etiam adeo profecit, ut S. Theologiæ Doctor crearetur, & doctissimis Theologis adnumeraret. Vnde etiam Inquisitor hæreseos constitutus fuit. Erat tum Iohannes Psefferkorn Christianæ professionis Iudæus, qui Maximilianum Cæsarē diu multumq; sollicitarat, ut libri Iudæorum omnes, præter Biblia, abolerentur, quod essent impij ac superstitiosi, adeoq; multos impedirēt, quò minus ad Christianismum conuerterent. Itaq; Maximilianus anno 1510 Vrieli Archiepiscopo Moguntinēsi mādat, ut Academijs aliquot, & in primis Hochstrato & Reuchlino, uiris doctissimis det negotiū deliberandi & exquirendi quid fieri conueniat. Ibi Reuchlinus contrarium sensit, atq; in ijs libris multa utilissima comprehendit. hocq; modo Hochstratum & Arnoldum Tongrum, magnæ authoritatis uiros in Academia Coloniensi, contra se excitauit, tanquam Iudæorum patrocinium suscepisset. Verum tandē Reuchlinus egregiè uicit, quātumuis Hochstratus per tres annos Romæ causam egisset, & Academia Parisiensis ipsius sententiæ subscripisset. Interim quoq; Hochstratus pro se Apologiam & Calalæ destructionē edidit, atq; de presbyterorum officio librum scripsit. Itaq; factum ut Iacobus apud suæ partis homines in magna exultatione fuerit, atq; Erasmo Roterodamo familiaris extiterit, Eras. lib. 16. Epist. & Ioan. Sleid,